

2020 年中医经典等级考试（I 级）条文范围

[内 经]

第一单元 宝命全形

1. 上古之人，其知道者，法于阴阳，和于术数，饮食有节，起居有常，不妄作劳，故能形与神俱，而尽终其天年，度百岁乃去。（《素问·上古天真论》）

2. 夫上古圣人之教下也，皆谓之虚邪贼风，避之有时，恬惓虚无，真气从之，精神内守，病安从来？（《素问·上古天真论》）

3. 肾者主水，受五藏六府之精而藏之，故五藏盛，乃能泻。（《素问·上古天真论》）

第二单元 阴阳应象

1. 阴阳者，天地之道也，万物之纲纪，变化之父母，生杀之本始，神明之府也。治病必求于本。（《素问·阴阳应象大论》）

2. 故积阳为天，积阴为地。阴静阳躁，阳生阴长，阳杀阴藏。阳化气，阴成形。寒极生热，热极生寒。寒气生浊，热气生清。（《素问·阴阳应象大论》）

3. 清气在下，则生飧泄；浊气在上，则生腹胀。此阴阳反作，病之逆从也。（《素问·阴阳应象大论》）

4. 故清阳出上窍，浊阴出下窍；清阳发腠理，浊阴走五藏；清阳实四肢，浊阴归六府。（《素问·阴阳应象大论》）

5. 阴味出下窍，阳气出上窍。味厚者为阴，薄为阴之阳；气厚者为阳，薄为阳之阴。味厚则泄，薄则通；气薄则发泄，厚则发热。（《素问·阴阳应象大论》）

6. 壮火之气衰，少火之气壮；壮火食气，气食少火；壮火散气，少火生气。（《素问·阴阳应象大论》）

7. 风胜则动，热胜则肿，燥胜则干，寒胜则浮，湿胜则濡泻。（《素问·阴阳应象大论》）

8. 冬伤于寒，春必温病；春伤于风，夏生飧泄；夏伤于暑，秋必痲疹；秋伤于湿，冬生咳嗽。（《素问·阴阳应象大论》）

9. 故曰：天地者，万物之上下也；阴阳者，血气之男女也；左右者，阴阳之道路也；水火者，阴阳之征兆也；阴阳者，万物之能始也。故曰：阴在内，阳之守也；阳在外，阴之使

也。（《素问·阴阳应象大论》）

10. 故善用针者，从阴引阳，从阳引阴，以右治左，以左治右，以我知彼，以表知里，以观过与不及之理，见微得过，用之不殆。（《素问·阴阳应象大论》）

11. 善诊者，察色按脉，先别阴阳；审清浊，而知部分；视喘息，听音声，而知所苦；观权衡规矩，而知病所主；按尺寸，观浮沉滑涩，而知病所生。以治无过，以诊则不失矣。（《素问·阴阳应象大论》）

第三单元 藏气法时

1. 心者，生之本，神之变也；其华在面，其充在血脉；为阳中之太阳，通于夏气。（《素问·六节藏象论》）

2. 肺者，气之本，魄之处也；其华在毛，其充在皮，为阳中之少阴，通于秋气。（《素问·六节藏象论》）

3. 肾者，主蛰，封藏之本，精之处也；其华在发，其充在骨，为阴中之太阴，通于冬气。（《素问·六节藏象论》）

4. 肝者，罢极之本，魂之居也；其华在爪，其充在筋，以生血气，其味酸，其色苍，此为阴中之少阳，通于春气。（《素问·六节藏象论》）

5. 脾、胃、大肠、小肠、三焦、膀胱者，仓廩之本，营之居也，名曰器，能化糟粕，转味而入出者也；其华在唇四白，其充在肌，其味甘，其色黄，此至阴之类，通于土气。凡十一藏取决于胆也。（《素问·六节藏象论》）

6. 脑、髓、骨、脉、胆、女子胞，此六者，地气之所生也，皆藏于阴而象于地，故藏而不泻，名曰奇恒之府。（《素问·五藏别论》）

7. 夫胃、大肠、小肠、三焦、膀胱，此五者，天气之所生也，其气象天，故泻而不藏。此受五藏浊气，名曰传化之府。此不能久留，输泻者也。魄门亦为五藏使，水谷不得久藏。（《素问·五藏别论》）

8. 所谓五藏者，藏精气而不泻也，故满而不能实。六府者，传化物而不藏，故实而不能满也。（《素问·五藏别论》）

9. 食气入胃，散精于肝，淫气于筋。食气入胃，浊气归心，淫精于脉。脉气流经，经气归于肺，肺朝百脉，输精于皮毛。毛脉合精，行气于府。府精神明，留于四藏，气归于权衡。权衡以平，气口成寸，以决死生。（《素问·经脉别论》）

10. 饮入于胃，游溢精气，上输于脾，脾气散精，上归于肺，通调水道，下输膀胱，水精四布，五经并行。合于四时五藏阴阳，揆度以为常也。（《素问·经脉别论》）

第四单元 血气精神

1. 天之在我者德也，地之在我者气也，德流气薄而生者也。故生之来谓之精，两精相搏谓之神，随神往来者谓之魂，并精而出入者谓之魄。（《灵枢·本神》）

2. 所以任物者谓之心，心有所忆谓之意，意之所存谓之志，因志而存变谓之思，因思而远慕谓之虑，因虑而处物谓之智。（《灵枢·本神》）

3. 肝藏血，血舍魂，肝气虚则恐，实则怒。脾藏营，营舍意，脾气虚则四肢不用，五藏不安，实则腹胀，经溲不利。心藏脉，脉舍神，心气虚则悲，实则笑不休。肺藏气，气舍魄，肺气虚则鼻塞不利，少气，实则喘喝胸盈仰息。肾藏精，精舍志，肾气虚则厥，实则胀，五藏不安。（《灵枢·本神》）

4. 人受气于谷，谷入于胃，以传与肺，五藏六府，皆以受气，其清者为营，浊者为卫。营在脉中，卫在脉外，营周不休，五十而复大会。阴阳相贯，如环无端。（《灵枢·营卫生会》）

5. 卫气行于阴二十五度，行于阳二十五度，分为昼夜，故气至阳而起，至阴而止。（《灵枢·营卫生会》）

6. 上焦如雾，中焦如沤，下焦如渫。（《灵枢·营卫生会》）

第五单元 经络

无

第六单元 百病始生

1. 喜怒不节则伤藏，藏伤则病起于阴也；清湿袭虚，则病起于下；风雨袭虚，则病起于上，是谓三部。（《灵枢·百病始生》）

2. 此必因虚邪之风，与其身形，两虚相得，乃客其形，两实相逢，众人肉坚。（《灵枢·百病始生》）

3. 阳络伤则血外溢，血外溢则衄血；阴络伤则血内溢，血内溢则后血。（《灵枢·百病始生》）

4. 因于寒，欲如运枢，起居如惊，神气乃浮；因于暑，汗，烦则喘喝，静则多言，体若燔炭，汗出而散；因于湿，首如裹，湿热不攘，大筋痠短，小筋弛长，痠短为拘，弛长为痿；

困于气，为肿。四维相代，阳气乃竭。（《素问·生气通天论》）

5. 阳气者，烦劳则张，精绝，辟积于夏，使人煎厥。目盲不可以视，耳闭不可以听，溃溃乎若坏都，汨汨乎不可止。（《素问·生气通天论》）

6. 阳气者，大怒则形气绝，而血菀于上，使人薄厥。有伤于筋，纵，其若不容。（《素问·生气通天论》）

7. 汗出偏沮，使人偏枯。汗出见湿，乃生痲痺。高粱之变，足生大丁，受如持虚。（《素问·生气通天论》）

8. 阳气者，精则养神，柔则养筋。（《素问·生气通天论》）

9. 阴者，藏精而起亟也；阳者，卫外而为固也。（《素问·生气通天论》）

10. 凡阴阳之要，阳密乃固。两者不和，若春无秋，若冬无夏，因而和之，是谓圣度。故阳强不能密，阴气乃绝；阴平阳秘，精神乃治；阴阳离决，精气乃绝。（《素问·生气通天论》）

11. 因于露风，乃生寒热。是以春伤于风，邪气留连，乃为洞泄；夏伤于暑，秋为痲症；秋伤于湿，上逆而咳，发为痿厥；冬伤于寒，春必温病。四时之气，更伤五藏。（《素问·生气通天论》）

12. 阴之所生，本在五味；阴之五宫，伤在五味。（《素问·生气通天论》）

13. 百病生于气也，怒则气上，喜则气缓，悲则气消，恐则气下，寒则气收，炅则气泄，惊则气乱，劳则气耗，思则气结。（《素问·举痛论》）

14. 诸风掉眩，皆属于肝。诸寒收引，皆属于肾。诸气膹郁，皆属于肺。诸湿肿满，皆属于脾。诸热瘡癰，皆属于火。诸痛痒疮，皆属于心。诸厥固泄，皆属于下。诸痿喘呕，皆属于上。诸禁鼓栗，如丧神守，皆属于火。诸痉项强，皆属于湿。诸逆冲上，皆属于火。诸胀腹大，皆属于热。诸躁狂越，皆属于火。诸暴强直，皆属于风。诸病有声，鼓之如鼓，皆属于热。诸病肘肿，疼酸惊骇，皆属于火。诸转反戾，水液浑浊，皆属于热。诸病水液，澄澈清冷，皆属于寒。诸呕吐酸，暴注下迫，皆属于热。（《素问·至真要大论》）

第七单元 病之形能

1. 人之伤于寒也，则为病热，热虽甚不死。其两感于寒而病者，必不免于死。（《素问·热论》）

2. 其未过三日者，可汗而已；其过三日者，可泄而已。（《素问·热论》）

3. 病热少愈，食肉则复，多食则遗，此其禁也。（《素问·热论》）

4. 黄帝问曰：有病温者，汗出辄复热，而脉躁疾不为汗衰，狂言不能食，病名为何？岐伯对曰：病名阴阳交，交者死也。（《素问·评热病论》）

5. 帝曰：有病身热，汗出烦满，烦满不为汗解，此为何病？岐伯曰：汗出而身热者，风也；汗出而烦满不解者，厥也，病名曰风厥。（《素问·评热病论》）

6. 劳风法在肺下。其为病也，使人强上冥视，唾出若涕，恶风而振寒，此为劳风之病。（《素问·评热病论》）

7. 五藏六府皆令人咳，非独肺也。（《素问·咳论》）

8. 经脉流行不止，环周不休，寒气入经而稽迟，泣而不行，客于脉外则血少，客于脉中则气不通，故卒然而痛。（《素问·举痛论》）

9. 黄帝问曰：痹之安生？岐伯对曰：风寒湿三气杂至合而为痹也。其风气胜者为行痹，寒气胜者为痛痹，湿气胜者为著痹也。（《素问·痹论》）

10. 阴气者，静则神藏，躁则消亡。饮食自倍，肠胃乃伤。（《素问·痹论》）

11. 论言治痿者，独取阳明何也？岐伯曰：阳明者，五藏六府之海，主润宗筋，宗筋主束骨而利机关也。冲脉者，经脉之海也，主渗灌溪谷，与阳明合于宗筋，阴阳摠宗筋之会，会于气街，而阳明为之长，皆属于带脉，而络于督脉。故阳明确，则宗筋纵，带脉不引，故足痿不用也。（《素问·痿论》）

12. 阳气衰于下，则为寒厥；阴气衰于下，则为热厥。（《素问·厥论》）

13. 帝曰：其有不从毫毛而生，五藏阳以竭也。津液充郭，其魄独居，孤精于内，气耗于外，形不可与衣相保，此四极急而动中，是气拒于内而形施于外。治之奈何？岐伯曰：平治于权衡，去宛陈莖。微动四极，温衣，缪刺其处，以复其形。开鬼门，洁净府。精以时服，五阳已布，疏涤五藏，故精自生，形自盛，骨肉相保，巨气乃平。（《素问·汤液醪醴论》）

第八单元 脉要精微

1. 诊法常以平旦，阴气未动，阳气未散，饮食未进，经脉未盛，络脉调匀，气血未乱，故乃可诊有过之脉。（《素问·脉要精微论》）

2. 夫脉者，血之府也。长则气治，短则气病，数则烦心，大则病进，上盛则气高，下盛则气胀，代则气衰，细则气少，涩则心痛，浑浑革革至如涌泉，病进而色弊，绵绵其去如弦绝，死。（《素问·脉要精微论》）

3. 夫五藏者，身之强也。头者，精明之府，头倾视深，精神将夺矣；背者，胸中之府，背曲肩随，府将坏矣。腰者，肾之府，转摇不能，肾将惫矣。膝者，筋之府，屈伸不能，行则倮附，筋将惫矣。骨者，髓之府，不能久立，行则振掉，骨将惫矣。得强则生，失强则死。

（《素问·脉要精微论》）

4. 四变之动，脉与之上下，以春应中规，夏应中矩，秋应中衡，冬应中权。（《素问·脉要精微论》）

5. 是故持脉有道，虚静为保。（《素问·脉要精微论》）

6. 脉盛，皮热，腹胀，前后不通，闷瞀，此谓五实。脉细，皮寒，气少，泄利前后，饮食不入，此谓五虚。……浆粥入胃，泄注止，则虚者活；身汗得后利，则实者活。（《素问·玉机真藏论》）

第九单元 异法方宜

1. 病之始起也，可刺而已；其盛，可待衰而已。故因其轻而扬之，因其重而减之，因其衰而彰之。（《素问·阴阳应象大论》）

2. 形不足者，温之以气；精不足者，补之以味。其高者，因而越之，其下者，引而竭之；中满者，泻之于内。（《素问·阴阳应象大论》）

3. 其有邪者，渍形以为汗；其在皮者，汗而发之；其慄悍者，按而收之；其实者，散而泻之。审其阴阳，以别柔刚，阳病治阴，阴病治阳，定其血气，各守其乡，血实宜决之，气虚宜引之。（《素问·阴阳应象大论》）

4. 病为本，工为标，标本不得，邪气不服，此之谓也。（《素问·汤液醪醴论》）

5. 寒者热之，热者寒之，微者逆之，甚者从之，坚者削之，客者除之，劳者温之，结者散之，留者攻之，燥者濡之，急者缓之，散者收之，损者温之，逸者行之，惊者平之，上之下之，摩之浴之，薄之劫之，开之发之，适事为故。（《素问·至真要大论》）

6. 热因热用，寒因寒用，塞因塞用，通因通用，必伏其所主，而先其所因。（《素问·至真要大论》）

7. 诸寒之而热者取之阴，热之而寒者取之阳，所谓求其属也。（《素问·至真要大论》）

[伤 寒]

第一章 辨太阳病脉证并治上

- 1.太阳之为病，脉浮，头项强痛而恶寒。(A)
- 2.太阳病，发热，汗出，恶风，脉缓者，名为中风。(A)
- 3.太阳病，或已发热，或未发热，必恶寒，体痛，呕逆，脉阴阳俱紧者，名为伤寒。(A)
- 12.太阳中风，阳浮而阴弱，阳浮者，热自发，阴弱者，汗自出，啬啬恶寒，淅淅恶风，翕翕发热，鼻鸣干呕者，桂枝汤主之。

桂枝_{三两，去皮} 芍药_{三两} 甘草_{二两，炙} 生姜_{三两，切} 大枣_{十二枚，擘}

上五味，㕮咀三味，以水七升，微火煮取三升，去滓，适寒温，服一升。服已须臾，歔热稀粥一升余，以助药力。温覆令一时许，遍身皦皦微似有汗者益佳，不可令如水流漓，病必不除。若一服汗出病差，停后服，不必尽剂。若不汗，更服依前法。又不汗，后服小促其间。半日许，令三服尽。若病重者，一日一夜服，周时观之。服一剂尽，病证犹在者，更作服。若汗不出，乃服至二、三剂，禁生冷、粘滑、肉面、五辛、酒酪、臭恶等物。(A)

- 13.太阳病，头痛，发热，汗出，恶风，桂枝汤主之。(A)
- 16.太阳病三日，已发汗，若吐、若下、若温针，仍不解者，此为坏病，桂枝不中与之也。观其脉证，知犯何逆，随证治之。桂枝本为解肌，若其人脉浮紧，发热汗不出者，不可与之也。常须识此，勿令误也。(A)
- 20.太阳病，发汗，遂漏不止，其人恶风，小便难，四肢微急，难以屈伸者，桂枝加附子汤主之。

桂枝_{三两，去皮} 芍药_{三两} 甘草_{三两，炙} 生姜_{三两，切} 大枣_{十二枚，擘} 附子_{一枚，炮，去皮，}

破八片

上六味，以水七升，煮取三升，去滓，温服一升。本云：桂枝汤今加附子，将息如前法。(A)

- 26.服桂枝汤，大汗出后，大烦渴不解，脉洪大者，白虎加人参汤主之。

知母_{六两} 石膏_{一斤，碎，绵裹} 甘草_{二两，炙} 粳米_{六合} 人参_{三两}

上五味，以水一斗，煮米熟汤成，去滓，温服一升，日三服。(A)

第二章 辨太阳病脉证并治中

31.太阳病，项背强几几，无汗恶风，葛根汤主之。

葛根_{四两} 麻黄_{三两}，去节 桂枝_{二两}，去皮 生姜_{三两}，切 甘草_{二两}，炙 芍药_{二两} 大枣_{十二}

枚，擘

上七味，以水一斗，先煮麻黄、葛根，减二升，去白沫，内诸药，煮取三升，去滓，温服一升。覆取微似汗，余如桂枝法将息及禁忌。诸汤皆仿此。(A)

32.太阳与阳明合病者，必自下利，葛根汤主之。(A)

33.太阳与阳明合病，不下利但呕者，葛根加半夏汤主之。

葛根_{四两} 麻黄_{三两}，去节 甘草_{二两}，炙 芍药_{二两} 桂枝_{二两}，去皮 生姜_{二两}，切 半夏_{半升}，

洗 大枣_{十二枚}，擘

上八味，以水一斗，先煮麻黄、葛根，减二升，去白沫。内诸药，煮取三升，去滓，温服一升。覆取微似汗。(A)

34.太阳病，桂枝证，医反下之，利遂不止，脉促者，表未解也；喘而汗出者，葛根黄芩黄连汤主之。

葛根_{半斤} 甘草_{二两}，炙 黄芩_{三两} 黄连_{三两}

上四味，以水八升，先煮葛根，减二升，内诸药，煮取二升，去滓，分温再服。(A)

35.太阳病，头痛，发热，身疼，腰痛，骨节疼痛，恶风，无汗而喘者，麻黄汤主之。

麻黄_{三两}，去节 桂枝_{二两}，去皮 甘草_{一两}，炙 杏仁_{七十个}，去皮尖

上四味，以水九升，先煮麻黄，减二升，去上沫，内诸药，煮取二升半，去滓，温服八合。覆取微似汗，不须歠粥，余如桂枝法将息。(A)

38.太阳中风，脉浮紧，发热恶寒，身疼痛，不汗出而烦躁者，大青龙汤主之。若脉微弱，汗出恶风者，不可服之。服之则厥逆，筋惕肉瞤，此为逆也。

麻黄_{六两}，去节 桂枝_{二两}，去皮 甘草_{二两}，炙 杏仁_{四十个}，去皮尖 生姜_{三两}，切 大枣_{十枚}，

擘 石膏_{如鸡子大}，碎

上七味，以水九升，先煮麻黄，减二升，去上沫，内诸药，煮取三升，去滓，温服一升，取微似汗。汗出多者，温粉粉之。一服汗者，停后服。若复服，汗多亡阳，遂虚，恶风，烦躁，不得眠也。(A)

39.伤寒脉浮缓，身不疼但重，乍有轻时，无少阴证者，大青龙汤发之。(A)

40.伤寒表不解，心下有水气，干呕发热而咳，或渴，或利，或噎，或小便不利、少腹满，或喘者，小青龙汤主之。

麻黄_{去节} 芍药 细辛 干姜 甘草_炙 桂枝_{去皮}，各三两 五味子_{半升}，洗 半夏_{半升}，洗

上八味，以水一斗，先煮麻黄，减二升，去上沫，内诸药，煮取三升，去滓，温服一升。若渴，去半夏，加栝楼根三两；若微利，去麻黄，加薤花，如一鸡子，熬令赤色；若噎者，去麻黄，加附子一枚，炮；若小便不利、少腹满者，去麻黄，加茯苓四两；若喘，去麻黄，加杏仁半升，去皮尖。且薤花不治利，麻黄主喘，今此语反之，疑非仲景意。

臣亿等谨按：小青龙汤大要治水。又按《本草》，薤花下十二水，若水去利则止也。又按《千金》，形肿者应内麻黄，乃内杏仁者，以麻黄发其阳故也。以此证之，岂非仲景意也。（A）

41.伤寒，心下有水气，咳而微喘，发热不渴。服汤已渴者，此寒去欲解也。小青龙汤主之。

（A）

53.病常自汗出者，此为荣气和，荣气和者，外不谐，以卫气不共荣气谐和故尔。以荣行脉中，卫行脉外。复发其汗，荣卫和则愈。宜桂枝汤。（A）

54.病人藏无他病，时发热自汗出而不愈者，此卫气不和也，先其时发汗则愈，宜桂枝汤。（A）

61.下之后，复发汗，昼日烦躁不得眠，夜而安静，不呕，不渴，无表证，脉沉微，身无大热者，干姜附子汤主之。

干姜_{一两} 附子_{一枚}，生用，去皮，切八片

上二味，以水三升，煮取一升，去滓，顿服。（A）

63.发汗后，不可更行桂枝汤，汗出而喘，无大热者，可与麻黄杏仁甘草石膏汤。

麻黄_{四两}，去节 杏仁_{五十个}，去皮尖 甘草_{二两}，炙 石膏_{半斤}，绵裹

上四味，以水七升，煮麻黄，减二升，去上沫，内诸药，煮取二升，去滓，温服一升。本云，黄耳杯。（A）

64.发汗过多，其人叉手自冒心，心下悸，欲得按者，桂枝甘草汤主之。

桂枝_{四两}，去皮 甘草_{二两}，炙

上二味，以水三升，煮取一升，去滓，顿服。（A）

71.太阳病，发汗后，大汗出，胃中干，烦躁不得眠，欲得饮水者，少少与饮之，令胃气和则愈。若脉浮，小便不利，微热消渴者，五苓散主之。

猪苓_{十八铢}，去皮 泽泻_{一两六铢} 白术_{十八铢} 茯苓_{十八铢} 桂枝_{半两}，去皮

上五味，捣为散，以白饮和服方寸匕，日三服，多饮暖水，汗出愈，如法将息。（A）

74.中风发热，六七日不解而烦，有表里证，渴欲饮水，水入即吐者，名曰水逆，五苓散主之。（A）

76.发汗后，水药不得入口为逆，若更发汗，必吐下不止。发汗吐下后，虚烦不得眠，若剧者，必反复颠倒，心中懊憹，栀子豉汤主之；若少气者，栀子甘草豉汤主之；若呕者，栀子生姜豉汤主之。

栀子豉汤方

栀子_{十四}个，擘 香豉_{四合}，绵裹

上二味，以水四升，先煮栀子，得二升半，内豉，煮取一升半，去滓，分为二服，温进一服。得吐者，止后服。

栀子甘草豉汤方

栀子_{十四}个，擘 甘草_{二两}，炙 香豉_{四合}，绵裹

上三味，以水四升，先煮栀子、甘草，取二升半，内豉，煮取一升半，去滓，分二服，温进一服。得吐者，止后服。

栀子生姜豉汤方

栀子_{十四}个，擘 生姜_{五两} 香豉_{四合}，绵裹

上三味，以水四升，先煮栀子、生姜，取二升半，内豉，煮取一升半，去滓，分二服，温进一服。得吐者，止后服。(A)

77.发汗若下之，而烦热胸中窒者，栀子豉汤主之。(A)

78.伤寒五六日，大下之后，身热不去，心中结痛者，未欲解也，栀子豉汤主之。(A)

82.太阳病发汗，汗出不解，其人仍发热，心下悸，头眩，身瞤动，振振欲擗地者，真武汤主之。

茯苓 芍药 生姜_切，各_三两 白术_二两 附子_一枚，炮，去皮，破八片

上五味，以水八升，煮取三升，去滓，温服七合，日三服。(A)

95.太阳病，发热汗出者，此为荣弱卫强，故使汗出，欲救邪风者，宜桂枝汤。(A)

96.伤寒五六日中风，往来寒热，胸胁苦满，嘿嘿不欲饮食，心烦喜呕，或胸中烦而不呕，或渴，或腹中痛，或胁下痞硬，或心下悸、小便不利，或不渴、身有微热，或咳者，小柴胡汤主之。

柴胡_{半斤} 黄芩_{三两} 人参_{三两} 半夏_{半升}，洗 甘草_炙 生姜_切，各_三两 大枣_{十二}枚，擘

上七味，以水一斗二升，煮取六升，去滓，再煎取三升，温服一升，日三服。若胸中烦而不呕者，去半夏、人参，加枳实一枚；若渴，去半夏，加人参合前成四两半、枳实四两；若腹中痛者，去黄芩，加芍药三两；若胁下痞硬，去大枣，加牡蛎四两；若心下悸、小便不利者，去黄芩，加茯苓四两；若不渴、外有微热者，去人参，加桂枝三两，温覆微汗愈；若咳者，去人参、大枣、生姜，加五味子半升、干姜二两。(A)

101.伤寒中风，有柴胡汤证，但见一证便是，不必悉具。凡柴胡汤病证而下之，若柴胡证不罢者，复与柴胡汤，必蒸蒸而振，却复发热汗出而解。(A)

102.伤寒二三日，心中悸而烦者，小建中汤主之。(A)

103.太阳病，过经十余日，反二三下之，后四五日，柴胡证仍在者，先与小柴胡。呕不止，

心下急，郁郁微烦者，为未解也，与大柴胡汤下之则愈。

柴胡_{半斤} 黄芩_{三两} 芍药_{三两} 半夏_{半升}，洗 生姜_{五两}，切 枳实_{四枚}，炙 大枣_{十二枚}，擘

上七味，以水一斗二升，煮取六升，去滓，再煎，温服一升，日三服。一方加大黄二两，若不加，恐不为大柴胡汤。(A)

106.太阳病不解，热结膀胱，其人如狂，血自下，下者愈。其外不解者，尚未可攻，当先解其外，外解已，但少腹急结者，乃可攻之，宜桃核承气汤。

桃仁_{五十个}，去皮尖 大黄_{四两} 桂枝_{二两}，去皮 甘草_{二两}，炙 芒硝_{二两}

上五味，以水七升，煮取二升半，去滓，内芒硝，更上火，微沸下火，先食温服五合，日三服，当微利。(A)

124.太阳病六七日，表证仍在，脉微而沉，反不结胸，其人发狂者，以热在下焦，少腹当硬满，小便自利者，下血乃愈。所以然者，以太阳随经，瘀热在里故也。抵当汤主之。

水蛭_熬 虻虫_{各三十个}，去翅足，熬 桃仁_{二十个}，去皮尖 大黄_{三两}，酒洗

上四味，以水五升，煮取三升，去滓，温服一升，不下，更服。(A)

第三章 辨太阳病脉证并治下

135.伤寒六七日，结胸热实，脉沉而紧，心下痛，按之石硬者，大陷胸汤主之。(A)

138.小结胸病，正在心下，按之则痛，脉浮滑者，小陷胸汤主之。(A)

146.伤寒六七日，发热微恶寒，支节烦疼，微呕，心下支结，外证未去者，柴胡桂枝汤主之。

桂枝_{一两半}，去皮 黄芩_{一两半} 人参_{一两半} 甘草_{一两}，炙 半夏_{二合半}，洗 芍药_{一两半} 大枣_{六枚}，擘 生姜_{一两半}，切 柴胡_{四两}

上九味，以水七升，煮取三升，去滓，温服一升，本云人参汤，作如桂枝法，加半夏、柴胡、黄芩，复如柴胡法。今用人参作半剂。(A)

147.伤寒五六日，已发汗而复下之，胸胁满微结，小便不利，渴而不呕，但头汗出，往来寒热，心烦者，此为未解也，柴胡桂枝干姜汤主之。

柴胡_{半斤} 桂枝_{三两}，去皮 干姜_{二两} 栝楼根_{四两} 黄芩_{三两} 牡蛎_{二两}，熬 甘草_{二两}，炙

上七味，以水一斗二升，煮取六升，去滓，再煎取三升，温服一升，日三服，初服微烦，复服汗出便愈。(A)

149.伤寒五六日，呕而发热者，柴胡汤证具，而以他药下之，柴胡证仍在者，复与柴胡汤。此虽已下之，不为逆，必蒸蒸而振，却发热汗出而解。若心下满而硬痛者，此为结胸也，大陷胸汤主之。但满而不痛者，此为痞，柴胡不中与之，宜半夏泻心汤。

半夏泻心汤方

半夏_{半升}，洗 黄芩 干姜 人参 甘草_炙，各_{三两} 黄连_{一两} 大枣_{十二枚}，擘

上七味，以水一斗，煮取六升，去滓，再煎取三升，温服一升，日三服。(A)

154. 心下痞，按之濡，其脉关上浮者，大黄黄连泻心汤主之。

大黄_{二两} 黄连_{一两}

上二味，以麻沸汤二升渍之，须臾绞去滓，分温再服。

臣亿等看详大黄黄连泻心汤，诸本皆二味，又后附子泻心汤，用大黄、黄连、黄芩、附子，恐是前方中亦有黄芩，后但加附子也，故后云附子泻心汤，本云加附子也。(A)

155. 心下痞，而复恶寒汗出者，附子泻心汤主之。

大黄_{二两} 黄连_{一两} 黄芩_{一两} 附子_{一枚}，炮，去皮，破，别煮取汁

上四味，切三味，以麻沸汤二升渍之，须臾绞去滓，内附子汁，分温再服。(A)

157. 伤寒汗出，解之后，胃中不和，心下痞硬，干噫食臭，胁下有水气，腹中雷鸣，下利者，生姜泻心汤主之。

生姜_{四两}，切 甘草_{三两}，炙 人参_{三两} 干姜_{一两} 黄芩_{三两} 半夏_{半升}，洗 黄连_{一两} 大枣

十二枚，擘

上八味，以水一斗，煮取六升，去滓，再煎取三升，温服一升，日三服。附子泻心汤，本云加附子。半夏泻心汤、甘草泻心汤，同体别名耳。生姜泻心汤，本云理中人参黄芩汤，去桂枝、术，加黄连并泻肝法。(A)

158. 伤寒中风，医反下之，其人下利日数十行，谷不化，腹中雷鸣，心下痞硬而满，干呕心烦不得安，医见心下痞，谓病不尽，复下之，其痞益甚，此非结热，但以胃中虚，客气上逆，故使硬也，甘草泻心汤主之。

甘草_{四两}，炙 黄芩_{三两} 干姜_{三两} 半夏_{半升}，洗 大枣_{十二枚}，擘 黄连_{一两}

上六味，以水一斗，煮取六升，去滓，再煎取三升，温服一升，日三服。

臣亿等谨按：……是半夏、生姜、甘草泻心三方，皆本于理中也，其方必各有人参，今甘草泻心中无者，脱落之也。又按《千金》并《外台秘要》，治伤寒匿食用此方皆有人参，知脱落无疑。(A)

161. 伤寒发汗，若吐若下，解后心下痞硬，噫气不除者，旋复代赭汤主之。

旋覆花_{三两} 人参_{二两} 生姜_{五两} 代赭_{一两} 甘草_{三两} 半夏_{半升}，洗 大枣_{十二枚}，擘

上七味，以水一斗，煮取六升，去滓，再煎取三升，温服一升，日三服。(A)

163. 太阳病，外证未除，而数下之，随协热而利，利下不止，心下痞硬，表里不解者，桂枝人参汤主之。

桂枝_{四两}，别切 甘草_{四两}，炙 白术_{三两} 人参_{三两} 干姜_{三两}

上五味，以水九升，先煮四味，取五升，内桂，更煮取三升，去滓，温服一升，日再

夜一服。(A)

168.伤寒若吐若下后，七八日不解，热结在里，表里俱热，时时恶风，大渴，舌上干燥而烦，欲饮水数升者，白虎加人参汤主之。

知母_{六两} 石膏_{一斤}，碎 甘草_{二两}，炙 人参_{二两} 粳米_{六合}

上五味，以水一斗，煮米熟汤成，去滓，温服一升，日三服。此方立夏后，立秋前乃可服。立秋后不可服；正月二月三月尚凛冷，亦不可与服之，与之则呕利而腹痛；诸亡血虚家亦不可与；得之则腹痛利者，但可温之，当愈。(A)

172.太阳与少阳合病，自下利者，与黄芩汤，若呕者，黄芩加半夏生姜汤主之。

黄芩汤方

黄芩_{三两} 芍药_{二两} 甘草_{二两}，炙 大枣_{十二枚}，擘

上四味，以水一斗，煮取三升，去滓，温服一升，日再夜一服。

黄芩加半夏生姜汤方

黄芩_{三两} 芍药_{二两} 甘草_{二两}，炙 大枣_{十二枚}，擘 半夏_{半升}，洗 生姜_{一两半}（一方三两，切）

上六味，以水一斗，煮取三升，去滓，温服一升，日再夜一服。(A)

173.伤寒胸中有热，胃中有邪气，腹中痛，欲呕吐者，黄连汤主之。

黄连_{三两} 甘草_{三两}，炙 干姜_{三两} 桂枝_{三两}，去皮 人参_{二两} 半夏_{半升}，洗 大枣_{十二枚}，擘

上七味，以水一斗，煮取六升，去滓，温服，昼三夜二。疑非仲景方。(A)

177.伤寒，脉结代，心动悸，炙甘草汤主之。

甘草_{四两}，炙 生姜_{三两}，切 人参_{二两} 生地黄_{一斤} 桂枝_{三两}，去皮 阿胶_{二两} 麦门冬_{半升}，去心 麻仁_{半升} 大枣_{三十枚}，擘

上九味，以清酒七升，水八升，先煮八味，取三升，去滓，内胶烊消尽，温服一升，日三服。一名复脉汤。(A)

第四章 辨阳明病脉证并治

180.阳明之为病，胃家实是也。(A)

182.问曰：阳明病外证云何？答曰：身热，汗自出，不恶寒，反恶热也。(A)

186.伤寒三日，阳明脉大。(A)

207.阳明病，不吐不下，心烦者，可与调胃承气汤。

甘草_{二两}，炙 芒硝_{半升} 大黄_{四两}，清酒洗

上三味，切，以水三升，煮二物至一升，去滓，内芒硝，更上微火一两沸，温顿服之，

以调胃气。(A)

208. 阳明病，脉迟，虽汗出不恶寒者，其身必重，短气腹满而喘，有潮热者，此外欲解，可攻里也。手足濇然汗出者，此大便已硬也，大承气汤主之；若汗多，微发热恶寒者，外未解也，一法，与桂枝汤。其热不潮，未可与承气汤；若腹大满不通者，可与小承气汤，微和胃气，勿令至大泄下。

大承气汤方

大黄四两，酒洗 厚朴半斤，炙，去皮 枳实五枚，炙 芒硝三合

上四味，以水一斗，先煮二物，取五升，去滓，内大黄，更煮取二升，内芒硝，更上微火一两沸，分温再服，得下余勿服。

小承气汤方

大黄四两 厚朴二两，炙，去皮 枳实三枚，大者，炙

上三味，以水四升，煮取一升二合，去滓，分温二服。初服汤当更衣，不尔者尽饮之，若更衣者，勿服之。(A)

219. 三阳合病，腹满身重，难以转侧，口不仁面垢，又作枯，一云向经。讖语遗尿。发汗则讖语；下之则额上生汗，手足逆冷。若自汗出者，白虎汤主之。

知母六两 石膏一斤，碎 甘草二两，炙 粳米六合

上四味，以水一斗，煮米熟汤成，去滓。温服一升，日三服。(A)

223. 若脉浮发热，渴欲饮水，小便不利者，猪苓汤主之。

猪苓去皮 茯苓 泽泻 阿胶 滑石碎，各一两

上五味，以水四升，先煮四味，取二升，去滓，内阿胶烱消，温服七合，日三服。(A)

229 阳明病，发潮热，大便溏，小便自可，胸胁满不去者，与小柴胡汤。

柴胡半斤 黄芩三两 人参三两 半夏半升，洗 甘草三两，炙 生姜三两，切 大枣十二枚，擘

上七味，以水一斗二升，煮取六升，去滓，再煎取三升。温服一升，日三服。(A)

230. 阳明病，胁下硬满，不大便而呕，舌上白胎者，可与小柴胡汤。上焦得通，津液得下，胃气因和，身濇然汗出而解。(A)

242. 病人小便不利，大便乍难乍易，时有微热，喘冒不能卧也，有燥屎也，宜大承气汤。(A)

243. 食谷欲呕，属阳明也，吴茱萸汤主之；得汤反剧者，属上焦也。

吴茱萸一升，洗 人参三两 生姜六两，切 大枣十二枚，擘

上四味，以水七升，煮取二升，去滓，温服七合，日三服。(A)

247 趺阳脉浮而涩，浮则胃气强，涩则小便数，浮涩相搏，大便则硬，其脾为约，麻子仁主之。

麻子仁二升 芍药半斤 枳实半斤，炙 大黄一斤，去皮 厚朴一尺，炙，去皮 杏仁一升，去皮尖，

熬，别作脂

上六味，蜜和丸如梧桐子大，饮服十丸，日三服，渐加，以知为度。(A)

248. 太阳病三日，发汗不解，蒸蒸发热者，属胃也，调胃承气汤主之。(A)

249. 伤寒吐后，腹胀满者，与调胃承气汤。(A)

252. 伤寒六七日，目中不了了，睛不和，无表里证，大便难，身微热者，此为实也，急下之，宜大承气汤。(A)

253. 阳明病，发热汗多者，急下之，宜大承气汤。(A)

254. 发汗不解，腹满痛者，急下之，宜大承气汤。(A)

255. 腹满不减，减不足言，当下之，宜大承气汤。(A)

259. 伤寒发汗已，身目为黄，所以然者，以寒湿_{一作温}在里不解故也。以为不可下也，于寒湿中求之。(A)

260. 伤寒七八日，身黄如橘子色，小便不利，腹微满者，茵陈蒿汤主之。(A)

261. 伤寒身黄发热，栀子柏皮汤主之。

肥栀子十五个，擘 甘草一两，炙 黄蘗二两

上三味，以水四升，煮取一升半，去滓，分温再服。(A)

262. 伤寒瘀热在里，身必黄，麻黄连轺赤小豆汤主之。

麻黄二两，去节 连轺二两，连翘根是 杏仁四十个，去皮尖 赤小豆一升 大枣十二枚，擘 生梓白皮切，一升 生姜二两，切 甘草二两，炙

上八味，以潦水一斗，先煮麻黄再沸，去上沫，内诸药，煮取三升，去滓，分温三服，半日服尽。(A)

第五章 辨少阳病脉证并治

263. 少阳之为病，口苦，咽干，目眩也。(A)

265. 伤寒，脉弦细，头痛发热者，属少阳。少阳不可发汗，发汗则谵语，此属胃。胃和则愈，胃不和，烦而悸。一云躁。(A)

第六章 辨太阴病脉证并治

273. 太阴之为病，腹满而吐，食不下，自利益甚，时腹自痛。若下之，必胸下结硬。(A)

277. 自利不渴者，属太阴，以其藏有寒故也，当温之，宜服四逆辈。(A)

第七章 辨少阴病脉证并治

281. 少阴之为病，脉微细，但欲寐也。(A)

285. 少阴病，脉细沉数，病为在里，不可发汗。(A)

301. 少阴病，始得之，反发热，脉沈者，麻黄细辛附子汤主之。

麻黄_{二两}，去节 细辛_{二两} 附子_{一枚}，炮，去皮，破八片

上三味，以水一斗，先煮麻黄，减二升，去上沫，内诸药，煮取三升，去滓，温服一升，日三服。(A)

302. 少阴病，得之二三日，麻黄附子甘草汤微发汗。以二三日无证，故微发汗也。

麻黄_{二两}，去节 甘草_{二两}，炙 附子_{一枚}，炮，去皮，破八片

上三味，以水七升，先煮麻黄一两沸，去上沫，内诸药，煮取三升，去滓，温服一升，日三服。(A)

303. 少阴病，得之二三日以上，心中烦，不得卧，黄连阿胶汤主之。

黄连_{四两} 黄芩_{二两} 芍药_{二两} 鸡子黄_{二枚} 阿胶_{三两}（一云三挺）

上五味，以水六升，先煮三物，取二升，去滓，内胶烊尽，小冷，内鸡子黄，搅令相得，温服七合，日三服。(A)

304. 少阴病，得之一二日，口中和，其背恶寒者，当灸之，附子汤主之。

附子_{二枚}，炮，去皮，破八片 茯苓_{三两} 人参_{二两} 白术_{四两} 芍药_{三两}

上五味，以水八升，煮取三升，去滓，温服一升，日三服。(A)

305. 少阴病，身体痛，手足寒，骨节痛，脉沉者，附子汤主之。(A)

306. 少阴病，下利便脓血者，桃花汤主之。

赤石脂_{一斤}，一半全用，一半筛末 干姜_{一两} 粳米_{一升}

上三味，以水七升，煮米令熟，去滓，温服七合，内赤石脂末方寸匕，日三服。若一服愈，余勿服。(A)

307. 少阴病，二三日至四五日，腹痛，小便不利，下利不止，便脓血者，桃花汤主之。(A)

309. 少阴病，吐利，手足逆冷，烦躁欲死者，吴茱萸汤主之。

吴茱萸_{一升} 人参_{二两} 生姜_{六两}，切 大枣_{十二枚}，擘

上四味，以水七升，煮取二升，去滓，温服七合，日三服。(A)

314. 少阴病，下利，白通汤主之。

葱白_{四茎} 干姜_{一两} 附子_{一枚}，生，去皮，破八片

上三味，以水三升，煮取一升，去滓，分温再服。(A)

315. 少阴病，下利脉微者，与白通汤。利不止，厥逆无脉，干呕烦者，白通加猪胆汁汤主之。服汤脉暴出者死，微续者生。

白通加猪胆汁汤方

葱白_{四茎} 干姜_{一两} 附子_{一枚}，生，去皮，破八片 人尿_{五合} 猪胆汁_{一合}

上五味，以水三升，煮取一升，去滓，内胆汁、人尿，和令相得，分温再服。若无胆，亦可用。(A)

316. 少阴病，二三日不已，至四五日，腹痛，小便不利，四肢沉重疼痛，自下利者，此为有水气。其人或咳，或小便利，或下利，或呕者，真武汤主之。

茯苓_{三两} 芍药_{三两} 白术_{二两} 生姜_{三两}，切 附子_{一枚}，炮，去皮，破八片

上五味，以水八升，煮取三升，去滓，温服七合，日三服。若咳者，加五味子半升、细辛一两、干姜一两；若小便利者，去茯苓；若下利者，去芍药，加干姜二两；若呕者，去附子，加生姜，足前为半斤。(A)

317. 少阴病，下利清谷，里寒外热，手足厥逆，脉微欲绝，身反不恶寒，其人面色赤，或腹痛，或干呕，或咽痛，或利止脉不出者，通脉四逆汤主之。

甘草_{二两}，炙 附子_{大者一枚}，生用，去皮，破八片 干姜_{三两}，强人可四两

上三味，以水三升，煮取一升二合，去滓，分温再服，其脉即出者愈。面色赤者，加葱九茎；腹中痛者，去葱，加芍药二两；呕者，加生姜二两；咽痛者，去芍药，加桔梗一两；利止脉不出者，去桔梗，加人参二两。病皆与方相应者，乃服之。(A)

318. 少阴病，四逆，其人或咳，或悸，或小便利，或腹中痛，或泄利下重者，四逆散主之。

甘草_炙 枳实_{破，水渍，炙干} 柴胡 芍药

上四味，各十分，捣筛，白饮和服方寸匕，日三服。咳者，加五味子、干姜各五分，并主下利；悸者，加桂枝五分；小便利者，加茯苓五分；腹中痛者，加附子一枚，炮令坼；泄利下重者，先以水五升，煮薤白三升，煮取三升，去滓，以散三方寸匕内汤中，煮取一升半，分温再服。(A)

320. 少阴病，得之二三日，口燥咽干者，急下之，宜大承气汤。

枳实_{五枚}，炙 厚朴_{半斤}，去皮，炙 大黄_{四两}，酒洗 芒硝_{三合}

上四味，以水一斗，先煮二味，取五升，去滓，内大黄，更煮取二升，去滓，内芒硝，更上火令一两沸，分温再服。一服得利，止后服。(A)

321. 少阴病，自利清水，色纯青，心下必痛，口干燥者，可下之，宜大承气汤。一法用大柴胡汤。(A)

322. 少阴病，六七日，腹胀不大便者，急下之，宜大承气汤。(A)

323. 少阴病，脉沉者，急温之，宜四逆汤。

甘草二两，炙 干姜一两半 附子一枚，生用，去皮，破八片

上三味，以水三升，煮取一升二合，去滓，分温再服。强人可大附子一枚，干姜三两。

(A)

第八章 辨厥阴病脉证并治

326. 厥阴之为病，消渴，气上撞心，心中疼热，饥而不欲食，食则吐蛔，下之利不止。(A)

337. 凡厥者，阴阳气不相顺接，便为厥。厥者，手足逆冷是也。(A)

338. 伤寒脉微而厥，至七八日肤冷，其人躁无暂安时者，此为藏厥，非蛔厥也。蛔厥者，其人当吐蛔。令病者静，而复时烦者，此为藏寒，蛔上入其膈，故烦，须臾复止，得食而呕，又烦者，蛔闻食臭出，其人常自吐蛔。蛔厥者，乌梅丸主之。又主久利。

乌梅三百枚 细辛六两 干姜十两 黄连十六两 当归四两 附子六两，炮，去皮 蜀椒四两，出汗
桂枝六两，去皮 人参六两 黄蘗六两

上十味，异捣筛，合治之，以苦酒渍乌梅一宿，去核，蒸之五斗米下，饭熟捣成泥，和药令相得，内臼中，与蜜杵二千下，丸如梧桐子大，先食饮服十丸，日三服，稍加至二十丸。禁生冷、滑物、臭食等。(A)

350. 伤寒脉滑而厥者，里有热，白虎汤主之。(A)

351. 手足厥寒，脉细欲绝者，当归四逆汤主之。

当归三两 桂枝三两，去皮 芍药三两 细辛三两 甘草二两，炙 通草二两 大枣二十五枚，擘（一法，十二枚）

上七味，以水八升，煮取三升，去滓，温服一升，日三服。(A)

353. 大汗出，热不去，内拘急，四肢疼，又下利厥逆而恶寒者，四逆汤主之。

甘草二两，炙 干姜一两半 附子一枚，生用，去皮，破八片

上三味，以水三升，煮取一升二合，去滓，分温再服。若强人可用大附子一枚，干姜三两。(A)

354. 大汗，若大下利，而厥冷者，四逆汤主之。(A)

371. 热利下重者，白头翁汤主之。

白头翁二两 黄蘗三两 黄连三两 秦皮三两

上四味，以水七升，煮取二升，去滓，温服一升，不愈，更服一升。(A)

378. 干呕吐涎沫，头痛者，吴茱萸汤主之。

吴茱萸一升，汤洗七遍 人参三两 大枣十二枚，擘 生姜六两，切

上四味，以水七升，煮取二升，去滓，温服七合，日三服。(A)

第九章 辨霍乱病脉证并治

385. 恶寒脉微一作缓而复利，利止亡血也，四逆加人参汤主之。

甘草二两，炙 附子一枚，生，去皮，破八片 干姜一两半 人参一两

上四味，以水三升，煮取一升二合，去滓，分温再服。(A)

386. 霍乱，头痛发热，身疼痛，热多欲饮水者，五苓散主之；寒多不用水者，理中丸主之。

五苓散方

猪苓去皮 白术 茯苓各十八铢 桂枝半两，去皮 泽泻一两六铢

上五味，为散，更治之，白饮和服方寸匕，日三服，多饮暖水，汗出愈。

理中丸方下有作汤加减法

人参 干姜 甘草炙 白术各三两

上四味，捣筛，蜜和为丸，如鸡子黄许大。以沸汤数合，和一丸，研碎，温服之，日三四，夜二服。腹中未热，益至三四丸，然不及汤。汤法：以四物依两数切，用水八升，煮取三升，去滓，温服一升，日三服。若脐上筑者，肾气动也，去术，加桂四两；吐多者，去术，加生姜三两；下多者，还用术；悸者，加茯苓二两；渴欲得水者，加术，足前成四两半；腹中痛者，加人参，足前成四两半；寒者，加干姜，足前成四两半；腹满者，去术，加附子一枚。服汤后如食顷，饮热粥一升许，微自温，勿发揭衣被。(A)

第十章 辨阴阳易差后劳复病脉证并治

397. 伤寒解后，虚羸少气，气逆欲吐，竹叶石膏汤主之。

竹叶二把 石膏一斤 半夏半升，洗 麦门冬一升，去心 人参二两 甘草二两，炙 粳米半升

上七味，以水一斗，煮取六升，去滓，内粳米，煮米熟，汤成去米，温服一升，日三服。(A)

[金 匱]

脏腑经络先后病脉证第一

问曰：上工治未病，何也？师曰：夫治未病者，见肝之病，知肝传脾，当先实脾，四季脾旺不受邪，即勿补之。中工不晓相传，见肝之病，不解实脾，惟治肝也。

夫肝之病，补用酸，助用焦苦，益用甘味之药调之。（酸入肝，焦苦入心，甘入脾。脾能伤肾，肾气微弱，则水不行；水不行，则心火气盛；心火气盛，则伤肺，肺被伤，则金气不行；金气不行，则肝气盛。故实脾，则肝自愈。）此治肝补脾之要妙也。肝虚则用此法，实则不在用之。

经曰：“虚虚实实，补不足，损有余”，是其义也，余脏准此。（1·A）

师曰：病人脉浮者在前，其病在表；浮者在后，其病在里，腰痛背强不能行，必短气而极也。（9·A）

（问曰：阳病十八，何谓也？师曰：头痛、项、腰、脊、臂、脚掣痛。阴病十八，何谓也？师曰：咳、上气、喘、哕、咽、肠鸣、胀满、心痛、拘急。五脏病各有十八，合为九十病，人又有六微，微有十八病，合为一百八病。五劳、七伤、六极，妇人三十六病，不在其中。）

问曰：病有急当救里救表者，何谓也？师曰：病，医下之，续得下利清谷不止，身体疼痛者，急当救里；后身体疼痛，清便自调者，急当救表也。（14·A）

夫病痼疾，加以卒病，当先治其卒病，后乃治其痼疾也。（15·A）

痉湿喝病脉证治第二

太阳病，关节疼痛而烦，脉沉而细一作缓。者，此名湿痹。《玉函》云：中湿。湿痹之候，小便不利，大便反快，但当利其小便。（14·A）

风湿相搏，一身尽疼痛，法当汗出而解。值天阴雨不止，医云此可发汗，汗之病不愈者，何也？盖发其汗，汗大出者，但风气去，湿气在，是故不愈也。若治风湿者，发其汗，但微微似欲出汗者，风湿俱去也。（18·A）

湿家身烦疼，可与麻黄加术汤发其汗为宜，慎不可以火攻之。（20·A）

病者一身尽疼，发热，日晡所剧者，名风湿。此病伤于汗出当风，或久伤取冷所致也，可与麻黄杏仁薏苡甘草汤。（21·A）

风湿，脉浮，身重，汗出恶风者，防己黄芪汤主之。（22·A）

伤寒八九日，风湿相搏，身体疼烦，不能自转侧，不呕不渴，脉浮虚而涩者，桂枝附子汤主之。若大便坚，小便自利者，去桂加白术汤主之。（23·A）

风湿相搏，骨节疼烦掣痛，不得屈伸，近之则痛剧，汗出短气，小便不利，恶风不欲去衣，或身微肿者，甘草附子汤主之。（24·A）

百合狐惑阴阳毒病脉证治第三

百合病，不经吐、下、发汗，病形如初者，百合地黄汤主之。（5·A）

狐惑之为病，状如伤寒，默默欲眠，目不得闭，卧起不安，蚀于喉为惑，蚀于阴为狐，不欲饮食，恶闻食臭，其面目乍赤、乍黑、乍白。蚀于上部则声喝一作嘎，甘草泻心汤主之。（10·A）

疟病脉证并治第四

（无）

中风历节病脉证并治第五

寸口脉浮而紧，紧则为寒，浮则为虚；寒虚相搏，邪在皮肤；浮者血虚，络脉空虚；贼邪不泻，或左或右；邪气反缓，正气即急，正气引邪，喎僻不遂。邪在于络，肌肤不仁；邪在于经，即重不胜；邪入于腑，即不识人；邪入于脏，舌即难言，口吐涎。（2·A）

诸肢节疼痛，身体魁羸，脚肿如脱，头眩短气，温温欲吐，桂枝芍药知母汤主之。（8·A）

病历节不可屈伸，疼痛，乌头汤主之。（10·A）

血痹虚劳病脉证并治第六

血痹阴阳俱微，寸口关上微，尺中小紧，外证身体不仁，如风痹状，黄芪桂枝五物汤主之。（2·A）

夫男子平人，脉大为劳，极虚亦为劳。（3·A）

夫失精家，少腹弦急，阴头寒，目眩一作目眶痛，发落，脉极虚芤迟，为清谷、亡血、

失精。脉得诸芤动微紧，男子失精，女子梦交。桂枝加龙骨牡蛎汤主之。(8·A)

虚劳里急，悸，衄，腹中痛，梦失精，四肢酸疼，手足烦热，咽干口燥，小建中汤主之。

(13·A)

虚劳腰痛，少腹拘急，小便不利者，八味肾气丸主之。方见脚气中。(15·A)

虚劳虚烦不得眠，酸枣仁汤主之。(17·A)

肺痿肺痛咳嗽上气病脉证治第七

肺痿吐涎沫而不咳者，其人不渴，必遗尿，小便数。所以然者，以上虚不能制下故也。

此为肺中冷，必眩，多涎唾，甘草干姜汤以温之。若服汤已渴者，属消渴。(5·A)

咳而上气，喉中水鸡声，射干麻黄汤主之。(6·A)

大(火)逆上气，咽喉不利，止逆下气者，麦门冬汤主之。(10·A)

肺痛，喘不得卧，葶苈大枣泻肺汤主之。(11·A)

咳而上气，此为肺胀，其人喘，目如脱状，脉浮大者，越婢加半夏汤主之。(13·A)

肺胀，咳而上气，烦躁而喘，脉浮者，心下有水，小青龙加石膏汤主之。(14·A)

肺痛胸满胀，一身面目浮肿，鼻塞清涕出，不闻香臭酸辛，咳逆上气，喘鸣迫塞，葶苈大枣泻肺汤主之。方见上，三日一剂，可至三四剂，此先服小青龙汤一剂乃进。小青龙汤方见咳嗽门中。(15·A)

《千金》苇茎汤：治咳有微热，烦满，胸中甲错，是为肺痛。(A)

奔豚气病脉证治第八

奔豚气上冲胸，腹痛，往来寒热，奔豚汤主之。(2·A)

发汗后，脐下悸者，欲作奔豚，茯苓桂枝甘草大枣汤主之。(4·A)

胸痹心痛短气病脉证治第九

胸痹之病，喘息咳唾，胸背痛，短气，寸口脉沉而迟，关上小紧数，栝蒌薤白白酒汤主之。(3·A)

胸痹不得卧，心痛彻背者，栝蒌薤白半夏汤主之。(4·A)

胸痹心中痞，留气结在胸，胸满，胁下逆抢心，枳实薤白桂枝汤主之；人参汤亦主之。

(5·A)

胸痹缓急者，薏苡附子散主之。(7·A)

腹满寒疝宿食病脉证治第十

病腹满，发热十日，脉浮而数，饮食如故，厚朴七物汤主之。(9·A)

腹中寒气，雷鸣切痛，胸胁逆满，呕吐，附子粳米汤主之。(10·A)

痛而闭者，厚朴三物汤主之。(11·A)

按之心下满痛者，此为实也，当下之，宜大柴胡汤。(12·A)

腹满不减，减不足言，当须下之，宜大承气汤。(13·A)

心胸中大寒痛，呕不能饮食，腹中寒，上冲皮起，出见有头足，上下痛而不可触近，大建中汤主之。(14·A)

肋下偏痛，发热，其脉紧弦，此寒也，以温药下之，宜大黄附子汤。(15·A)

寒疝腹中痛，及胁痛里急者，当归生姜羊肉汤主之。(18·A)

五脏风寒积聚病脉证并治第十一

肝着，其人常欲蹈其胸上，先未苦时，但欲饮热，旋覆花汤主之。臣亿等校诸本旋覆花汤方，皆同。(7·A)

趺阳脉浮而涩，浮则胃气强，涩则小便数，浮涩相搏，大便则坚，其脾为约，麻子仁丸主之。(15·A)

肾着之病，其人身体重，腰中冷，如坐水中，形如水状，反不渴，小便自利，饮食如故，病属下焦，身劳汗出，衣一作表里冷湿，久久得之，腰以下冷痛，腹重如带五千钱，甘姜苓术汤主之。(16·A)

痰饮咳嗽病脉证并治第十二

问曰：夫饮有四，何谓也？师曰：有痰饮，有悬饮，有溢饮，有支饮。(1·A)

问曰：四饮何以为异？师曰：其人素盛今瘦，水走肠间，沥沥有声，谓之痰饮；饮后水流在胁下，咳唾引痛，谓之悬饮；饮水流行，归于四肢，当汗出而不汗出，身体疼重，谓之溢饮；咳逆倚息，短气不得卧，其形如肿，谓之支饮。(2·A)

病痰饮者，当以温药和之。(15·A)

心下有痰饮，胸胁支满，目眩，苓桂术甘汤主之。(16·A)

夫短气，有微饮，当从小便去之，苓桂术甘汤主之；方见上。肾气丸亦主之。方见脚气中。(17·A)

病悬饮者，十枣汤主之。(22·A)

病溢饮者，当发其汗，大青龙汤主之；小青龙汤亦主之。(23·A)

心下有支饮，其人苦冒眩，泽泻汤主之。(25·A)

支饮不得息，葶苈大枣泻肺汤主之。方见肺痈中。(27·A)

呕家本渴，渴者为欲解，今反不渴，心下有支饮故也，小半夏汤主之。《千金》云小半夏加茯苓汤。(28·A)

腹满，口舌干燥，此肠间有水气，己椒苈黄丸主之。(29·A)

假令瘦人脐下有悸，吐涎沫而癫眩，此水也，五苓散主之。(31·A)

咳逆倚息不得卧，小青龙汤主之。方见上。(35·A)

消渴小便利淋病脉证并治第十三

男子消渴，小便反多，以饮一斗，小便一斗，肾气丸主之。方见脚气中。(3·A)

水气病脉证并治第十四

师曰：病有风水、有皮水、有正水、有石水、有黄汗。风水其脉自浮，外证骨节疼痛，恶风；皮水其脉亦浮，外证胛肿，按之没指，不恶风，其腹如鼓，不渴，当发其汗。正水，其脉沉迟，外证自喘；石水其脉自沉，外证腹满不喘。黄汗其脉沉迟，身发热，胸满，四肢头面肿，久不愈，必致痈脓。(1·A)

师曰：诸有水者，腰以下肿，当利小便；腰以上肿，当发汗乃愈。(18·A)

……经为血，血不利则为水，名曰血分。(19·A)

问曰：病有血分水分，何也？师曰：经水前断，后病水，名曰血分，此病难治；先病水，后经水断，名曰水分，此病易治。何以故？去水，其经自下。(20·A)

风水，脉浮身重，汗出恶风者，防己黄芪汤主之。腹痛加芍药。(22·A)

风水恶风，一身悉肿，脉浮不渴，续自汗出，无大热，越婢汤主之。(23·A)

皮水为病，四肢肿，水气在皮肤中，四肢聩聩动者，防己茯苓汤主之。(24·A)

里水，越婢加术汤主之；甘草麻黄汤亦主之。(25·A)

厥而皮水者，蒲灰散主之。方见消渴中。(27·A)

黄疸病脉证并治第十五

谷疸之为病，寒热不食，食即头眩，心胸不安，久久发黄为谷疸。茵陈蒿汤主之。(13·A)

酒黄疸，心中懊憹或热痛，栀子大黄汤主之。(15·A)

诸病黄家，但利其小便；假令脉浮，当以汗解之，宜桂枝加黄芪汤主之。方见水气病中。
(16·A)

黄疸腹满，小便不利而赤，自汗出，此为表和里实，当下之，宜大黄硝石汤。(19·A)

诸黄，腹痛而呕者，宜柴胡汤。必小柴胡汤，方见呕吐中。(21·A)

惊悸吐衄下血胸满瘀血病脉证治第十六

下血，先便后血，此远血也，黄土汤主之。(15·A)

下血，先血后便，此近血也，赤小豆当归散主之。方见狐惑中。(16·A)

心气不定，吐血、衄血，泻心汤主之。(17·A)

呕吐哕下利病脉证治第十七

跌阳脉浮而涩，浮则为虚，涩则伤脾，脾伤则不磨，朝食暮吐，暮食朝吐，宿谷不化，名曰胃反。脉紧而涩，其病难治。(5·A)

呕而肠鸣，心下痞者，半夏泻心汤主之。(10·A)

诸呕吐，谷不得下者，小半夏汤主之。方见痰饮中。(12·A)

呕吐而病在膈上，后思水者，解，急与之。思水者，猪苓散主之。(13·A)

呕而发热者，小柴胡汤主之。(15·A)

食已即吐者，大黄甘草汤主之。《外台》方又治吐水。(17·A)

胃反，吐而渴欲饮水者，茯苓泽泻汤主之。(18·A)

哕逆者，橘皮竹茹汤主之。(23·A)

下利便脓血者，桃花汤主之。(42·A)

热利下重者，白头翁汤主之。(43·A)

疮痈肠痈浸淫病脉证并治第十八

(无)

跌蹶手指臂肿转筋阴狐疝蚘虫病脉证治第十九

蛔厥者，乌梅丸主之。(8·A)

妇人妊娠病脉证并治第二十

师曰：妇人有漏下者，有半产后因续下血都不绝者，有妊娠下血者，假令妊娠腹中痛，为胞阻，胶艾汤主之。(4·A)

妇人怀娠，腹中疔痛，当归芍药散主之。(5·A)

妇人产后病脉证并治第二十一

产后腹中疔痛，当归生姜羊肉汤主之；并治腹中寒疝，虚劳不足。(4·A)

产后腹痛，烦满不得卧，枳实芍药散主之。(5·A)

妇人杂病脉证并治第二十二

妇人咽中如有炙脔，半夏厚朴汤主之。(5·A)

妇人脏躁，喜悲伤欲哭，象如神灵所作，数欠伸，甘麦大枣汤主之。(6·A)

问曰：妇人年五十所，病下利数十日不止，暮即发热，少腹里急，腹满，手掌烦热，唇口干燥，何也？师曰：此病属带下。何以故？曾经半产，瘀血在少腹不去。何以知之？其证唇口干燥，故知之。当以温经汤主之。(9·A)

妇人腹中诸疾痛，当归芍药散主之。(17·A)

[温 病]

第一篇 叶天士《温热论》

1. 温邪上受，首先犯肺，逆传心包。肺主气属卫，心主血属营，辨营卫气血虽与伤寒同，若论治法则与伤寒大异也。

2. 盖伤寒之邪留恋在表，然后化热入里，温邪则热变最速，未传心包，邪尚在肺，肺主气，其合皮毛，故云在表。在表初用辛凉轻剂。夹风则加入薄荷、牛蒡之属，夹湿加芦根、滑石之流。或透风于热外，或渗湿于热下，不与热相搏，势必孤矣。

3. 不尔，风夹温热而燥生，清窍必干，为水主之气不能上荣，两阳相劫也。湿与温合，蒸郁而蒙蔽于上，清窍为之壅塞，浊邪害清也。其病有类伤寒，其验之之法，伤寒多有变证，温热虽久，在一经不移，以此为辨。

4. 前言辛凉散风，甘淡驱湿，若病仍不解，是渐欲入营也。营分受热，则血液受劫，心神不安，夜甚无寐，或斑点隐隐，即撤去气药。如从风热陷入者，用犀角、竹叶之属；如从湿热陷入者，犀角、花露之品，掺入凉血清热方中。若加烦躁，大便不通，金汁亦可加入，老年或平素有寒者，以人中黄代之，急急透斑为要。

5. 若斑出热不解者，胃津亡也，主以甘寒，重则如玉女煎，轻则如梨皮、蔗浆之类。或其人肾水素亏，虽未及下焦，先自彷徨矣，必验之于舌，如甘寒之中加入咸寒，务在先安未受邪之地，恐其陷入易易耳。

6. 若其邪始终在气分流连者，可冀其战汗透邪，法宜益胃，令邪与汗并，热达腠开，邪从汗出。解后胃气空虚，当肤冷一昼夜，待气还自温暖如常矣。盖战汗而解，邪退正虚，阳从汗泄，故渐肤冷，未必即成脱证。此时宜令病者，安舒静卧，以养阳气来复，旁人切勿惊惶，频频呼唤，扰其元神，使其烦躁。但诊其脉，若虚软和缓，虽倦卧不语，汗出肤冷，却非脱证；若脉急疾，躁扰不卧，肤冷汗出，便为气脱之证矣。更有邪盛正虚，不能一战而解，停一二日再战汗而愈者，不可不知。

7. 再论气病有不传血分，而邪留三焦，亦如伤寒中少阳病也。彼则和解表里之半，此则分消上下之势，随证变法，如近时杏、朴、苓等类，或如温胆汤之走泄。因其仍在气分，犹可望其战汗之门户，转疟之机括。

8. 大凡看法，卫之后方言气，营之后方言血。在卫汗之可也，到气才可清气，入营犹可透热转气，如犀角、玄参、羚羊角等物，入血就恐耗血动血，直须凉血散血，如生地、丹皮、

阿胶、赤芍等物。否则前后不循缓急之法，虑其动手便错，反致慌张矣。

9. 且吾吴湿邪害人最广，如面色白者，须要顾其阳气，湿胜则阳微也，法应清凉，然到十分之六七，即不可过于寒凉，恐成功反弃，何以故耶？湿热一去，阳亦衰微也；面色苍者，须要顾其津液，清凉到十分之六七，往往热减身寒者，不可就云虚寒，而投补剂，恐炉烟虽熄，灰中有火也，须细察精详，方少少与之，慎不可直率而往也。又有酒客里湿素盛，外邪入里，里湿为合。在阳旺之躯，胃湿恒多；在阴盛之体，脾湿亦不少，然其化热则一。热病救阴犹易，通阳最难。救阴不在血，而在津与汗；通阳不在温，而在利小便，然较之杂证，则有不同也。

10. 再论三焦不得从外解，必致成里结。里结于何，在阳明胃与肠也。亦须用下法，不可以气血之分，就不可下也。但伤寒邪热在里，劫烁津液，下之宜猛；此多湿邪内搏，下之宜轻。伤寒大便溏为邪已尽，不可再下；湿温病大便溏为邪未尽，必大便硬，慎不可再攻也，以粪燥为无湿矣。

11. 再人之体，脘在腹上，其地位处于中，按之痛，或自痛，或痞胀，当用苦泄，以其入腹近也。必验之于舌：或黄或浊，可与小陷胸汤或泻心汤，随证治之；或白不燥，或黄白相兼，或灰白不渴，慎不可乱投苦泄。其中有外邪未解，里先结者，或邪郁未伸，或素属中冷者，虽有脘中痞闷，宜从开泄，宣通气滞，以达归于肺，如近俗之杏、蔻、橘、桔等，是轻苦微辛，具流动之品可耳。

12. 再前云舌黄或浊，须要有地之黄。若光滑者，乃无形湿热中有虚象，大忌前法。其脐以上为大腹，或满或胀或痛，此必邪已入里矣，表证必无，或十只存一。亦要验之于舌，或黄甚，或如沉香色，或如灰黄色，或老黄色，或中有断纹，皆当下之，如小承气汤，用槟榔、青皮、枳实、元明粉、生首乌等。若未见此等舌，不宜用此等法，恐其中有湿聚太阴为满，或寒湿错杂为痛，或气壅为胀，又当以别法治之。

35. 再妇人病温与男子同，但多胎前产后，以及经水适来适断。大凡胎前病，古人皆以四物加减用之，谓护胎为要，恐来害妊，如热极用井底泥，蓝布浸冷，覆盖腹上等，皆是保护之意，但亦要看其邪之可解处。用血赋之药不灵，又当省察，不可认板法。然须步步保护胎元，恐损正邪陷也。

36. 至于产后之法，按方书谓慎用苦寒，恐伤其已亡之阴也。然亦要辨其邪能从上中解者，稍从证用之，亦无妨也。不过勿犯下焦，且属虚体，当如虚怯人病邪而治。总之无犯实虚虚之禁，况产后当气血沸腾之候，最多空窠，邪势必乘虚内陷，虚处受邪，为难治也。

37. 如经水适来适断，邪将陷血室，少阳伤寒言之详悉，不必多赘。但数动与正伤寒不

同。仲景立小柴胡汤，提出所陷热邪，参、枣扶胃气，以冲脉隶属阳明也，此与虚者为合治。若热邪陷入，与血相结者，当从陶氏小柴胡汤去参、枣加生地、桃仁、楂肉、丹皮或犀角等。若本经血结自甚，必少腹满痛，轻者刺期门，重者小柴胡汤去甘药加延胡、归尾、桃仁，夹寒加肉桂心，气滞者加香附、陈皮、枳壳等。然热陷血室之证，多有谵语如狂之象，防是阳明胃实，当辨之。血结者身体必重，非若阳明之轻旋便捷者。何以故耶？阴主重浊，络脉被阻，侧旁气痹，连胸背皆拘束不遂，故祛邪通络，正合其病。往往延久，上逆心包，胸中痛，即陶氏所谓血结胸也。王海藏出一桂枝红花汤加海蛤、桃仁，原是表里上下一齐尽解之理，看此方大有巧手，故录出以备学者之用。

第二篇 薛生白《湿热病篇》

1. 湿热证，始恶寒，后但热不寒，汗出胸痞，舌白或黄，口渴不引饮。
2. 湿热证，恶寒无汗，身重头痛，湿在表分。宜藿香、香薷、羌活、苍术皮、薄荷、牛蒡子等味。头不痛者，去羌活。
3. 湿热证，恶寒发热，身重，关节疼痛，湿在肌肉，不为汗解。宜滑石、大豆黄卷、茯苓皮、苍术皮、藿香叶、鲜荷叶、白通草、桔梗等味。不恶寒者，去苍术皮。
4. 湿热证，三四日即口噤，四肢牵引拘急，甚则角弓反张，此湿热侵入经络脉隧中。宜鲜地龙、秦艽、威灵仙、滑石、苍耳子、丝瓜藤、海风藤、酒炒黄连等味。
8. 湿热证，寒热如疟，湿热阻遏膜原。宜柴胡、厚朴、槟榔、草果、藿香、苍术、半夏、干菖蒲、六一散等味。
9. 湿热证，数日后脘中微闷，知饥不食，湿邪蒙绕三焦。宜藿香叶、薄荷叶、鲜荷叶、枇杷叶、佩兰叶、芦尖、冬瓜仁等味。
10. 湿热证，初起发热，汗出胸痞，口渴舌白，湿伏中焦。宜藿梗、蔻仁、杏仁、枳壳、桔梗、郁金、苍术、厚朴、草果、半夏、干菖蒲、佩兰叶、六一散等味。
11. 湿热证，数日后自利，溺赤，口渴，湿流下焦，宜滑石、猪苓、茯苓、泽泻、萆薢、通草等味。
12. 湿热证，舌遍体白，口渴，湿滞阳明。宜用辛开，如厚朴、草果、半夏、干菖蒲等味。
13. 湿热证，舌根白，舌尖红，湿渐化热，余湿犹滞。宜辛泄佐清热，如蔻仁、半夏、干菖蒲、大豆黄卷、连翘、绿豆衣、六一散等味。

14. 湿热证，初起即胸闷不知人，瞀乱大叫痛，湿热阻闭中上二焦。宜草果、槟榔、鲜菖蒲、芫荽、六一散各重用，或加皂角，地浆水[2]煎。

17. 湿热证，呕恶不止，昼夜不瘥，欲死者，肺胃不和，胃热移肺，肺不受邪也。宜用川连三四分，苏叶二三分，两味煎汤，呷下即止。

18. 湿热证，咳嗽昼夜不安，甚至喘不得眠者，暑邪入于肺络，宜葶苈、枇杷叶、六一散等味。

19. 湿热证，十余日，大势已退，唯口渴，汗出，骨节痛，余邪留滞经络。宜元米汤泡于术，隔一宿，去术煎饮。

21. 湿热证，胸痞发热，肌肉微疼，始终无汗者，腠理暑邪内闭。宜六一散一两，薄荷叶三四分，泡汤调下即汗解。

22. 湿热证，按法治之，数日后，或吐下一时并至者，中气亏损，升降悖逆，宜生谷芽、莲心、扁豆、米仁、半夏、甘草、茯苓等味，甚则用理中法。

25. 湿热证，身冷脉细，汗泄胸痞，口渴舌白，湿中少阴之阳。宜人参、白术、附子、茯苓、益智等味。

27. 湿热证，按法治之，诸证皆退，惟目瞑则惊悸梦惕，余邪内留，胆气未舒，宜酒浸郁李仁、姜汁炒枣仁、猪胆皮等味。

28. 湿热证，曾开泄下夺，恶候皆平，独神思不清，倦语不思食，溺数，唇齿干。胃气不输，肺气不布，元神大亏，宜人参、麦冬、石斛、木瓜、生甘草、生谷芽、鲜莲子等味。

31. 湿热证，初起壮热口渴，脘闷懊侬，眼欲闭，时谵语，浊邪蒙闭上焦。宜涌泄，用枳壳、桔梗、淡豆豉、生栀子，无汗者加葛根。

34. 湿热证，七八日，口不渴，声不出，与饮食亦不却，默默不语，神识昏迷，进辛香凉泄，芳香逐秽，俱不效。此邪入厥阴，主客浑受，宜仿吴又可三甲散，醉地鳖虫、醋炒鳖甲、土炒穿山甲、生僵蚕、柴胡、桃仁泥等味。

37. 湿热证，壮热口渴，自汗，身重，胸痞，脉洪大而长者，此太阴之湿与阳明之热相合。宜白虎加苍术汤。

38. 湿热证，湿热伤气，四肢困倦，精神减少，身热气高，心烦溺黄，口渴自汗，脉虚者，用东垣清暑益气汤主治。

第三篇 吴鞠通《温病条辨》选

一、上焦篇

1. 温病者：有风温、有温热、有温疫、有温毒、有暑温、有湿温、有秋燥、有冬温、有温疟。

3. 太阴之为病，脉不缓不紧而动数，或两寸独大，尺肤热，头痛，微恶风寒，身热自汗，口渴，或不渴，而咳，午后热甚者，名曰温病。

4. 太阴风温、温热、温疫、冬温，初起恶风寒者，桂枝汤主之；但热不恶寒而渴者，辛凉平剂银翘散主之。温毒、暑温、湿温、温疟，不在此例。

6. 太阴风温，但咳，身不甚热，微渴者，辛凉轻剂桑菊饮主之。

7. 太阴温病，脉浮洪，舌黄，渴甚，大汗，面赤恶热者，辛凉重剂白虎汤主之。

8. 太阴温病，脉浮大而芤，汗大出，微喘，甚至鼻孔煽者，白虎加人参汤主之；脉若散大者；急用之；倍人参。

9. 白虎本为达热出表，若其人脉浮弦而细者，不可与也；脉沉者，不可与也；不渴者，不可与也；汗不出者，不可与也；常须识此，勿令误也。

10. 太阴温病，气血两燔者，玉女煎去牛膝加元参主之。

11. 太阴温病，血从上溢者，犀角地黄汤合银翘散主之。有中焦病者，以中焦法治之。若吐粉红血水者，死不治；血从上溢，脉七、八至以上，面反黑者，死不治；可用清络育阴法。

15. 太阴温病，寸脉大，舌绛而干，法当渴，今反不渴者，热在营中也，清营汤去黄连主之。

16. 太阴温病，不可发汗，发汗而汗不出者，必发斑疹；汗出过多者，必神昏谵语。发斑者，化斑汤主之；发疹者，银翘散去豆豉，加细生地、丹皮、大青叶、倍元参主之。禁升麻、柴胡、当归、防风、羌活、白芷、葛根、三春柳。神昏谵语者，清宫汤主之，牛黄丸、紫雪丹、局方至宝丹亦主之。

17. 邪入心包，舌蹇肢厥，牛黄丸主之，紫雪丹亦主之。

18. 温毒咽痛喉肿，耳前耳后肿，颊肿，面正赤，或喉不痛，但外肿，甚则耳聋，俗名大头温、虾蟆温者，普济消毒饮去柴胡、升麻主之。初起一、二日，再去芩、连，三、四日加之佳。

22. 形似伤寒，但右脉洪大而数，左脉反小于右，口渴甚，面赤，汗大出者，名曰暑温，

在手太阴，白虎汤主之；脉芤甚者，白虎加人参汤主之。

24. 手太阴暑温，如上条证，但汗不出者，新加香薷饮主之。

26. 手太阴暑温，或已经发汗，或未发汗，而汗不止，烦渴而喘，脉洪大有力者，白虎汤主之；脉洪大而芤者，白虎加人参汤主之；身重者，湿也，白虎加苍术汤主之；汗多，脉散大，喘喝欲脱者，生脉散主之。

30. 脉虚，夜寐不安，烦渴，舌赤，时有谵语，目常开不闭，或喜闭不开，暑入手厥阴也。手厥阴暑温，清营汤主之。舌白滑者，不可与也。

31. 手厥阴暑温，身热不恶寒，清神不了了时时谵语者，安宫牛黄丸主之，紫雪丹亦主之。

33. 小儿暑温，身热，卒然痉厥，名曰暑痫[1]，清营汤主之，亦可少与紫雪丹。

34. 大人暑痫，亦同上法。热初入营，肝风内动，手足瘛疔，可于清营汤中加钩藤、丹皮、羚羊角。

37. 头痛微恶寒，面赤烦渴，舌白，脉濡而数者，虽在冬月，犹为太阴伏暑也。

38. 太阴伏暑，舌白口渴，无汗者，银翘散去牛蒡、元参加杏仁、滑石主之。

39. 太阴伏暑，舌赤口渴，无汗者，银翘散加生地、丹皮、赤芍、麦冬主之。

40. 太阴伏暑、舌白口渴，有汗，或大汗不止者，银翘散去牛蒡子、元参、芥穗，加杏仁、石膏、黄芩主之；脉洪大，渴甚汗多者，仍用白虎法；脉虚大而芤者，仍用人参白虎法。

42. 伏暑、暑温、湿温，证本同源，前后互参，不可偏执。

43. 头痛恶寒，身重疼痛，舌白不渴，脉弦细而濡，面色淡黄，胸闷不饥，午后身热，状若阴虚，病难速已，名曰湿温，汗之则神昏耳聋，甚则目瞑不欲言，下之则洞泄，润之则病深不解，长夏深秋冬日同法，三仁汤主之。

54. 秋感燥气，右脉数大，伤手太阴气分者，桑杏汤主之。

二、中焦篇

1. 面目俱赤，语声重浊，呼吸俱粗，大便闭，小便涩，舌苔老黄，甚则黑有芒刺，但恶热，不恶寒，日晡益甚者，传至中焦，阳明温病也。脉浮洪躁甚者，白虎汤主之；脉沉数有力，甚则脉体反小而实者，大承气汤主之。暑温、湿温、温疟，不在此例。

2. 阳明温病，脉浮而促者，减味竹叶石膏汤主之。

5. 阳明温病，无汗，小便不利，谵语者，先与牛黄丸；不大便，再与调胃承气汤。

6. 阳明温病，面目俱赤，肢厥，甚则通体皆厥，不蜷，但神昏，不大便，七、八日以外，小便赤，脉沉伏，或并脉亦厥，胸腹满坚，甚则拒按，喜凉饮者，大承气汤主之。

7. 阳明温病，纯利稀水无粪者，谓之热结旁流，调胃承气汤主之。

9. 阳明温病，下利谵语，阳明脉实，或滑疾者，小承气汤主之；脉不实者，牛黄丸主之，紫雪丹亦主之。

10. 温病三焦俱急，大热大渴，舌燥。脉不浮而燥甚，舌色金黄，痰涎壅甚，不可单行承气者，承气合小陷胸汤主之。

11. 阳明温病，无上焦证，数日不大便，当下之，若其人阴素虚，不可行承气者，增液汤主之。服增液汤已，周十二时观之，若大便不下者，合调胃承气汤微和之。

12. 阳明温病，下后汗出，当复其阴，益胃汤主之。

13. 下后无汗脉浮者，银翘汤主之；脉浮洪者，白虎汤主之；脉洪而芤者，白虎加人参汤主之。

15. 下后数日，热不退，或退不尽，口燥咽干，舌苔干黑，或金黄色，脉沉而有力者，护胃承气汤微和之；脉沉而弱者，增液汤主之。

16. 阳明温病，下后二、三日，下证复现，脉下甚沉，或沉而无力，止可与增液，不可与承气。

17. 阳明温病，下之不通，其证有五：应下失下，正虚不能运药，不运药者死，新加黄龙汤主之。喘促不宁，痰涎壅滞，右寸实大，肺气不降者，宣白承气汤主之。左尺牢坚，小便赤痛，时烦渴甚，导赤承气汤主之。邪闭心包，神昏舌短，内窍不通，饮不解渴者，牛黄承气汤主之。津液不足，无水舟停者，间服增液，再不下者，增液承气汤主之。

19. 阳明温病，干呕口苦而渴，尚未可下者，黄连黄芩汤主之。不渴而舌滑者属湿温。

20. 阳明温病，舌黄燥，肉色绛，不渴者，邪在血分，清营汤主之。若滑者，不可与也，当于湿温中求之。

21. 阳明斑者，化斑汤主之。

22. 阳明温病，下后疹续出者，银翘散去豆豉，加细生地大青叶元参丹皮汤主之。

23. 斑疹，用升提则衄，或厥，或呛咳，或昏痉，用壅补则瞀乱。

24. 斑疹阳明证悉具，外出不快，内壅特甚者，调胃承气汤微和之，得通则已，不可令大泄，大泄则内陷。

27. 阳明温病，不甚渴，腹不满，无汗，小便不利，心中懊恼者，必发黄，黄者栀子柏皮汤主之。

28. 阳明温病，无汗，或但头汗出，身无汗，渴欲饮水，腹满舌燥黄，小便不利者，必发黄，茵陈蒿汤主之。

29. 阳明温病，无汗，实证未剧，不可下。小便不利者，甘苦合化，冬地三黄汤主之。

30. 温病小便不利者，淡渗不可与也，忌五苓、八正辈。

31. 温病燥热，欲解燥者，先滋其干，不可纯用苦寒也，服之反燥甚。

36. 阳明温病，斑疹温痘、温疮、温毒，发黄、神昏谵语者，安宫牛黄丸主之。

37. 风温、温热、温疫、温毒、冬温之在中焦，阳明病居多；湿温之在中焦，太阴病居多；暑温则各半也。

38. 脉洪滑，面赤身热头晕，不恶寒，但恶热，舌上黄滑苔，渴欲凉饮，饮不解渴，得水则呕，按之胸下痛，小便短，大便闭者，阳明暑温，水结在胸也，小陷胸汤加枳实主之。

41. 暑温蔓延三焦，舌滑微黄，邪在气分者，三石汤主之；邪气久留，舌绛苔少，热搏血分者，加味清宫汤主之；神识不清，热闭内窍者，先与紫雪丹，再与清宫汤。

42. 暑温伏暑，三焦均受，舌灰白，胸痞闷，潮热呕恶，烦渴自利，汗出溺短者，杏仁滑石汤主之。

56. 吸受秽湿，三焦分布，热蒸头胀，身痛呕逆，小便不通，神识昏迷，舌白，渴不多饮，先宜芳香通神利窍，安宫牛黄丸；继用淡渗分消浊湿，茯苓皮汤。

58. 三焦湿郁，升降失司，脘连腹胀，大便不爽，一加减正气散主之。

59. 湿郁三焦，脘闷，便溏，身痛，舌白，脉象模糊，二加减正气散主之。

60. 秽湿着里，舌黄脘闷，气机不宣，久则酿热，三加减正气散主之。

61. 秽湿着里，邪阻气分，舌白滑，脉右缓，四加减正气散主之。

62. 秽湿着里，脘闷便泄，五加减正气散主之。

63. 脉缓身痛，舌淡黄而滑，渴不多饮，或竟不渴，汗出热解，继而复热。内不能运水谷之湿，外复感时令之湿，发表攻里，两不可施，误认伤寒，必转坏证。徒清热则湿不退，徒祛湿则热愈炽，黄芩滑石汤主之。

66. 湿郁经脉，身热身痛，汗多自利，胸腹白疹，内外合邪，纯辛走表，纯苦清热，皆在所忌，辛凉淡法，薏苡竹叶散主之。

三、下焦篇

1. 风温、温热、温疫、温毒、冬温，邪在阳明久羁，或已下，或未下，身热面赤，口干舌燥，甚则齿黑唇裂，脉沉实者，仍可下之；脉虚大，手足心热甚于手足背者，加减复脉汤主之。

2. 温病误表，津液被劫，心中震震，舌强神昏，宜复脉法复其津液，舌上津回则生；汗自出，中无所主者，救逆汤主之。

3. 温病耳聋，病系少阴，与柴胡汤者必死，六、七日以后，宜复脉辈复其精。

4. 劳倦内伤，复感温病，六、七日以外不解者，宜复脉法。

5. 温病已汗而不得汗，已下而热不退，六、七日以外，脉尚躁盛者，重与复脉汤。

6. 温病误用升散，脉结代，甚则脉两至者，重与复脉，虽有他证，后治之。

7. 汗下后，口燥咽干，神倦欲眠，舌赤苔老，与复脉汤。

8. 热邪深入，或在少阴，或在厥阴，均宜复脉。

9. 下后大便溏甚，周十二时三、四行，脉仍数者，未可与复脉汤，一甲煎主之；服一二日，大便不溏者，可与一甲复脉汤。

10. 下焦温病，但大便溏者，即与一甲复脉汤。

11. 少阴温病，真阴欲竭，壮火复炽，心中烦，不得卧者，黄连阿胶汤主之。

12. 夜热早凉，热退无汗，热自阴来者，青蒿鳖甲汤主之。

13. 热邪深入下焦，脉沉数，舌干齿黑，手指但觉蠕动，急防痉厥，二甲复脉汤主之。

14. 下焦温病，热深厥甚，脉细促，心中憺憺大动，甚则心中痛者，三甲复脉汤主之。

15. 既厥且哕（俗名呃忒），脉细而劲，小定风珠主之。

16. 热邪久羁，吸烁真阴，或因误表，或因妄攻，神倦瘵瘵，脉气虚弱，舌绛苔少，时时欲脱者，大定风珠主之。

17. 壮火尚盛者，不得用定风珠、复脉。邪少虚多者，不得用黄连阿胶汤。阴虚欲痉者，不得用青蒿鳖甲汤。

18. 痉厥神昏，舌短，烦躁，手少阴证未罢者，先与牛黄、紫雪辈，开窍搜邪，再与复脉汤存阴，三甲潜阳。临证细参，勿致倒乱。

20. 时欲漱口不欲咽，大便黑而易者，有瘀血也，犀角地黄汤主之。21. 少腹坚满，小便自利，夜热昼凉，大便闭，脉沉实者，蓄血也，桃仁承气汤主之，甚则抵当汤。

21. 少腹坚满，小便自利，夜热昼凉，大便闭，脉沉实者，蓄血也，桃仁承气汤主之，

甚则抵当汤。

36. 暑邪深入少阴消渴者，连梅汤主之；入厥阴麻痹者，连梅汤主之；心热烦躁神迷甚者，先与紫雪丹，再与连梅汤。

39. 暑邪久热，寢不安，食不甘，神识不清，阴液元气两伤者，三才汤主之。

48. 喘咳息促，吐稀涎，脉洪数，右大于左，喉哑，是为热饮，麻杏石甘汤主之。

55. 湿温久羁，三焦弥漫，神昏窍阻，少腹硬满，大便不下，宣清导浊汤主之。